



**JABATAN HAL EHWAL AGAMA ISLAM
NEGERI SEMBILAN DARUL KHUSUS**

TAJUK : “KENALI ALLAH, KUKUHKAN AQIDAH”

3 APRIL 2015M / 13 JUMADA AL-AKHIRAH

الْحَمْدُ لِلَّهِ الْقَائِلِ :

(az-Dzariyat:50) فَفِرُّوا إِلَى اللَّهِ^ص إِنِّي لَكُمْ مِنْهُ نَذِيرٌ مُبِينٌ ﴿٥٠﴾

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ
وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ وَمَنْ
تَبِعَهُمْ بِإِحْسَانٍ إِلَى يَوْمِ الدِّينِ.

أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تَقَاتِهِ، وَلَا تَمُوتُنَّ إِلَّا وَأَنْتُمْ
مُسْلِمُونَ.

SIDANG JUMAAT YANG DIMULIAKAN,

Khatib memperingatkan diri ini dan sidang jemaah yang dimuliakan sekalian, marilah kita bersama-sama bertaqwa kepada Allah SWT dengan sebenar-benar taqwa, agar kita dapat melaksanakan segala perintah-Nya dan menjauhi segala tegahan-Nya. Marilah bersama kita berpegang kepada tali Allah SWT yakni dengan menjaga hubungan kita sebagai hamba-Nya dan juga hubungan sesama insan, agar penyatuan ummah dapat direalisasikan bermula di dalam rumah Allah SWT yang penuh barakah ini. Nikmat Islam yang dikecapi dan hamparan luas keamanan yang kita nikmati selama ini, seharusnya kita syukuri dengan meningkatkan amal ibadah bagi memperkukuhkan lagi hubungan kita dengan Maha Pencipta lagi Maha Berkuasa serta menjalin eratkan hubungan kita sesama manusia. Semoga, hidup kita sentiasa dilimpahi rahmat serta kebahagiaan di dunia dan di akhirat. Firman Allah SWT di dalam surah Ali 'Imran petikan ayat 103:

وَأَعْتَصِمُوا بِحَبْلِ اللَّهِ جَمِيعًا وَلَا تَفَرَّقُوا

Maksudnya : *“Dan berpegang teguhlah kamu semua kepada tali Allah, dan janganlah berpecah belah”.*

Mimbar pada hari ini akan membicarakan khutbah yang bertajuk **“KENALI ALLAH, KUKUHKAN AQIDAH”.**

SIDANG JUMAAT YANG DIRAHMATI ALLAH SWT,

Sebagaimana yang kita yakini, Allah SWT adalah Tuhan yang layak disembah, Yang Maha Esa dan tiada tuhan selain Allah. Persoalannya mengapa tingkahlaku kita bertentangan dengan keyakinan tersebut sehingga kita masih tetap melakukan dosa, masih berlagak seolah-olah kita tidak binasa?. Inilah bukti hakikatnya kita belum lagi mengenali Allah SWT dalam erti kata sebenar seperti yang dikehendaki oleh Allah SWT.

Kejahilan ini boleh diatasi melalui penyuburan jiwa dengan ilmu, khususnya ilmu yang membicarakan tentang ketauhidan Allah SWT. Justeru, marilah sama-sama kita tingkatkan usaha mengenali Allah SWT dengan mengukuhkan ilmu aqidah yang diperolehi melalui pendidikan dan praktikal dalam aspek kehidupan seharian.

Firman Allah SWT dalam ayat 103, surah Ali 'Imran:

وَأَعْتَصِمُوا بِحَبْلِ اللَّهِ جَمِيعًا وَلَا تَفَرَّقُوا ۗ وَاذْكُرُوا نِعْمَتَ اللَّهِ عَلَيْكُمْ إِذْ كُنْتُمْ أَعْدَاءً فَأَلَّفَ بَيْنَ

قُلُوبِكُمْ فَأَصْبَحْتُمْ بِنِعْمَتِهِ إِخْوَانًا وَكُنْتُمْ عَلَىٰ شَفَا حُفْرَةٍ مِّنَ النَّارِ فَأَنْقَذَكُم مِّنْهَا ۚ كَذَٰلِكَ يُبَيِّنُ اللَّهُ

لَكُمْ ءَايَاتِهِ ۗ لَعَلَّكُمْ تَهْتَدُونَ ﴿١٠٣﴾

Maksudnya: “dan berpegang teguhlah kamu sekalian kepada tali Allah (ugama Islam), dan janganlah kamu bercerai-berai; dan kenanglah nikmat Allah kepada kamu ketika kamu bermusuhan-musuhan (semasa jahiliyah

dahulu), lalu Allah menyatukan antara hati kamu (hingga kamu bersatu-padu dengan nikmat Islam), maka jadilah kamu dengan nikmat Allah itu orang-orang Islam yang bersaudara. dan kamu dahulu telah berada di tepi jurang neraka (disebabkan kekufuran kamu semasa jahiliyah), lalu Allah selamatkan kamu dari neraka itu (disebabkan nikmat Islam juga). Demikianlah Allah menjelaskan kepada kamu ayat-ayat keterangan-Nya, supaya kamu mendapat petunjuk hidayah-Nya.”

Ayat tersebut menggesa umat Islam supaya berpegang teguh dengan syariat Allah SWT dan tidak seorang pun terkecuali daripadanya. Namun disebabkan kedangkalan ilmu, terdapat orang Islam sendiri yang tidak memahami kehendak agama suci yang mereka anuti. Kejahilan mereka dapat kita ketahui melalui cara hidup atau kenyataan-kenyataan mereka yang tidak bertepatan dengan kehendak syariat Islam. Fenomena ini mengundang aqidah yang lemah seterusnya tersasar daripada jalan sebenar untuk mengenali Allah SWT.

SIDANG JUMAAT YANG BERBAHAGIA,

Kehidupan kita tidak akan mencapai tahap kegemilangan jika redha Allah tidak dijadikan tunjang. Berdasarkan perkara inilah umat Islam dikehendaki sentiasa mendahulukan hak-hak Allah SWT dalam setiap aspek kehidupan. Dengan itu, proses mengenali Tuhan Yang Maha Berkuasa ini berjalan seiring dengan perjalanan hidup kita. Ada beberapa aspek penting kehidupan yang perlu diberi tumpuan dan dilakukan dengan tepat agar Allah SWT dikenali serta matlamat hidup kita akan tercapai. Antaranya:

1. Mengenal Allah SWT melalui aspek pendidikan.

Sebagai ibubapa atau ketua keluarga, menjadi tanggungjawab yang diamanahkan kepada kita untuk memperkenalkan Allah SWT kepada anak-anak dan kepada mereka di bawah jagaan kita sejak mereka kecil lagi. Ini bersesuaian dengan ungkapan *“melentur buluh biarlah dari rebungnya”* dan *“permulaan agama itu adalah mengenal Allah”*.

Dewasa ini, terdapat segelintir orang Islam yang berpendapat bahawa kanak-kanak yang masih kecil tidak sesuai diberi pendedahan untuk mengenal Allah SWT kerana kedudukan ilmu itu terlalu tinggi berbanding usia serta pemikiran mereka. Kejahilan ini membawa kesan yang sangat besar dalam jiwa umat Islam. Ramai dalam kalangan umat Islam takut kepada makhluk dan benda-benda ghaib seperti hantu dan suasana gelap. Ketakutan itu pula diwariskan kepada anak-anak serta generasi di bawahnya. Inilah kesan didikan ibubapa yang diperkenalkan dan menjadi pegangan anak-anak sejak kecil walaupun hakikatnya ibubapa itu sendiri tidak pernah melihat hantu.

Lupakah kita kepada pesanan Rasulullah SAW, sabda Baginda yang bermaksud: ***“Setiap anak itu dilahirkan dalam keadaan suci bersih (fitrah), maka ibubapanyalah yang menjadikan mereka yahudi atau nasrani atau majusi (melalui pendidikan).”*** (Muttafaquun Alaih).

Alangkah indahnya jika anak-anak diperkenalkan kepada Allah SWT dengan perkara-perkara yang baik dan buruk melalui ungkapan-ungkapan

yang didendangkan di telinga mereka sejak kecil lagi seperti ‘Allah suka kita melakukan ini’ dan ungkapan ‘Allah tidak suka kita lakukan ini’. Justeru, mereka akan membesar dengan berpegang kepada keyakinan yang satu.

2. Mengenal Allah SWT melalui rutin seharian.

Kehidupan manusia dipenuhi dengan perkara-perkara yang menjadi rutin sehariannya seperti bekerja, makan, minum dan tidur. Sedarkah kita sebagai individu muslim, Rasulullah SAW memberi tunjuk ajar cara menjalani rutin harian kita itu. Setiap permulaan perlakuan kita hendaklah dengan membaca basmalah. Sabda Rasulullah SAW:

كُلُّ أَمْرٍ ذِي بَالٍ لَا يُبْدَأُ فِيهِ بِبِسْمِ اللَّهِ الرَّحْمَنِ الرَّحِيمِ فَهُوَ أَقْطَعُ

Maksudnya: “Setiap perkara penting yang tidak dimulai dengan Bismillahir Rahmanir Rahim, maka amalan tersebut terputus keberkatannya”.
(Riwayat al khatib al Baghdadi)

Menyebut nama Allah SWT bermaksud memohon pertolongan-Nya. Setiap perbuatan dalam rutin harian kita adalah berlaku atas keizinan Allah SWT. Secara tidak langsung kita menjalani rutin harian dengan akhlak yang mulia sesuai dengan peribadi seorang muslim, dan di dalam hati pula sentiasa terselit harapan agar Allah SWT memberi bantuan dalam setiap kerja yang dilakukan.

3. Mengenal Allah SWT melalui aspek ibadah.

Ibadah adalah aspek terpenting dalam kehidupan. Beribadah bererti mengabdikan diri kepada sesuatu. Pengabdian dan khidmat seseorang itu akan menjadi sempurna jika dia mengenali atau mengetahui kepada siapa dia mengabdikan diri serta untuk apa pengabdian tersebut. Manusia diciptakan untuk menyembah dan mengabdikan diri kepada Allah SWT sebagaimana yang disebut dalam firman Allah dalam surah adz-Dzariyat ayat 56:

وَمَا خَلَقْتُ الْجِنَّ وَالْإِنْسَ إِلَّا لِيَعْبُدُونِ ﴿٥٦﴾

Maksudnya: “Dan (ingatlah) Aku tidak menciptakan jin dan manusia melainkan untuk mereka menyembah dan beribadat kepada-Ku”

Kelemahan aqidah bukan saja datang dari kesilapan melakukan ibadah, namun ia juga berlaku akibat kecuaiannya kita dalam beribadah, iaitu dengan memandang ringan sesuatu ibadah seperti melengah-lengahkan solat kerana memenuhi kehendak nafsu menonton filem, bermain dan sebagainya. Kelonggaran aqidah juga terbentuk apabila kita mendahulukan hak makhluk daripada hak Allah SWT, seperti hadir ke masjid tetapi tidak beriktikaf di dalamnya, sebaliknya berada di luar masjid kerana meraikan orang lain.

Sebagai umat Islam beriman, pasti kita tidak mahu sedikit pun berasa rugi di dunia ini, sama ada dari segi harta, kedudukan dan kuasa tetapi sebagai orang yang beriman adakah kita rela melepaskan keuntungan serta kejayaan yang hakiki? Inilah pertanyaan yang perlu dijawab melalui

keimanan, iaitu membenarkan dengan hati, dilafazkan dengan lidah dan dibuktikan dengan perlakuan anggota tubuh badan.

SIDANG JUMAAT YANG DIRAHMATI ALLAH SWT,

Kedangkalan ilmu mengundang kelemahan aqidah. Kelemahan aqidah menjauhkan rahmat Allah SWT dan pertolongan-Nya. Ketiadaan Rahmat Allah SWT dalam kehidupan membawa kebuntuan dan kecelaruan dalam mencari kebahagiaan yang dihajatkan. Justeru, sekali lagi mimbar menyeru jemaah sekalian marilah bersama-sama kita mengukuhkan aqidah dengan lebih mengenali Allah SWT melalui cara hidup yang betul dan berkualiti bertepatan dengan ikrar yang kita lafazkan dalam solat setiap kali didirikan.

Firman Allah dalam surah al-An'am ayat 162:

قُلْ إِنَّ صَلَاتِي وَنُسُكِي وَمَحْيَايَ وَمَمَاتِي لِلَّهِ رَبِّ الْعَالَمِينَ ﴿١٦٢﴾

Maksudnya : *Katakanlah : “Sesungguhnya solatku, ibadahku, hidupku dan matiku adalah untuk Allah Tuhan seluruh alam semata-mata.”*

Mengakhiri khutbah pada hari ini, marilah tingkatkan ilmu dalam diri kita serta ahli keluarga kita untuk mencapai keimanan dan ketaqwaan yang teguh. Bermula daripada diri kita, mendidik dan memberi tunjuk ajar kepada kaum keluarga dan seterusnya menyampaikan risalah dakwah kepada masyarakat umum. Didikan pertama yang perlu dihayati sebagai hamba adalah mengenal Allah, sifat-sifat-Nya, kebesaran dan ketentuan-Nya.

Hayati, renungi dan fahamilah firman Allah SWT:

قُلْ هُوَ اللَّهُ أَحَدٌ ۝ اللَّهُ الصَّمَدُ ۝ لَمْ يَلِدْ وَلَمْ يُولَدْ ۝ وَلَمْ يَكُن لَّهُ كُفُوًا أَحَدٌ ۝

(al-Ikhlâs :1-4)

Maksudnya: Katakanlah (Wahai Muhammad) : “Dialah Allah Yang Maha Esa. Allah tempat meminta segala sesuatu. (Allah) yang tidak mempunyai anak dan tidak pula diperanakkan. Dan tidak ada sesuatu pun yang setaraf dengan-Nya.”

بَارِكْ اللَّهُ لِيْ وَلَكُمْ فِي الْقُرْآنِ الْعَظِيمِ، وَتَفَعَّلِيْ وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ، وَتَقَبَّلْ مِنِّيْ وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ، أَقُولُ قَوْلِيْ هَذَا وَأَسْتَغْفِرُ اللَّهَ الْعَظِيمَ لِيْ وَلَكُمْ، وَلِسَائِرِ الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا فَوْزَ الْمُسْتَغْفِرِينَ وَيَا نَجَاةَ التَّائِبِينَ.